

四庫全書

集部

欽定四庫全書

集部

元文類卷十九

詳校官通政使<sub>臣</sub>夢吉

助教<sub>臣</sub>常循覆勘

總校官庶吉士<sub>臣</sub>朱鈐

校對官中書<sub>臣</sub>嵇承志

謄錄監生<sub>臣</sub>劉文耀

欽定四庫全書

元文類卷九

元 蘇天爵 編

詔赦

即位詔

庚申年四月

王 鶚

朕惟祖宗肇造區宇奄有四方武功迭興文治多闕五十餘年於此矣蓋時有先後事有緩急天下大業非一聖一朝所能兼備也先皇帝即位之初風飛雷厲將大有為憂國愛民之心雖切於己尊賢使能之道未得其

人方董夔門之師遽遺鼎湖之泣豈期餘恨竟弗克終肆予冲人渡江之後蓋將深入焉乃聞國中重以僉軍之擾黎庶驚駭若不能一朝居者予為此懼駟騎馳歸目前之急雖紓境外之兵未戢乃會羣議以集良規不意宗盟輒先推戴左右萬里名王巨僚不召而來者有之不謀而同者皆是咸謂國家之大統不可久曠神人之重寄不可暫虛求之今日太祖嫡孫中先皇母弟之列以賢以長止予一人雖在征伐之間每存仁愛之念

博施濟衆實可為天下主天道助順人謨與能祖訓傳  
國大典於是乎在孰敢不從朕峻辭固讓至于再三祈  
懇益堅誓以死請於是俯循輿情勉登大寶自惟寡昧  
屬時多艱若涉淵冰罔知攸濟爰當臨御之始宜新弘  
遠之規祖述變通正在今日務施實德不尚虛文雖承  
平未易遽臻而饑渴所當先務畧舉其切時便民者條  
列於后嗚呼歷數攸歸欽應上天之命勲親斯託敢忘  
烈祖之規建極體元與民更始朕所不逮更賴我遠近

宗族中外文武同心協力獻可替否之助也誕告多方  
體予至意

中統建元詔

王鶚

祖宗以神武定四方淳德御羣下朝廷草創未遑潤色  
之文政事變通漸有網維之目朕獲纘舊服載擴丕圖  
稽列聖之洪規講前代之定制建元表歲示人君萬世  
之傳紀時書王見天下一家之義法春秋之正始體大  
易之乾元炳煥皇猷權輿治道可自庚申年五月十九

日建號為中統元年惟即位體元之始必立經陳紀為  
先故內立都省以總權綱外設總司以平庶政仍以興  
利除害之事補偏救弊之方隨詔以頒申畫于后於戲  
秉錄握樞必因時而建號施仁發政期與物以更新敷  
宣懇惻之辭表著憂勞之意凡在臣庶體予至懷

中統元年五月赦

王 鶚

我國家烈祖肇基先皇繼統惟圖日闢於疆宇未免歲  
耀於兵威事有當為時難遽已朕獲承丕祚已降德音

念士卒暴露者久之而人民離散者多矣干戈載戢田  
里俾安不期同氣之中俄有閱牆之侮顧其沖幼敢啟  
茲謀皆被姦讒相濟以惡彼既陷於禍亂此當應以師  
徒朕惟父母兄弟之親宗廟社稷之重遣使敦諭至于  
再三亂紀執迷曾無少革以致宗族共怒戈甲乃興重  
念兵方弭而復徵民甫休而再擾危疑未釋反側不安  
詿誤者至及於無辜拘囚者或生於不測非朕本意盡  
然傷心宜推曠蕩之恩普示哀矜之意於戲悛心或啟



忍加管蔡之刑內難既平迺續成康之治

賜高麗國王厯日詔

中統五年正月

王鶚

諭高麗國王植獻歲發春式邁三陽之會對時育物宜  
同一視之仁睠爾外邦忠於內附肇用正旦庸展賀儀  
方使介之還歸須英書之播告今賜卿中統五年厯日  
一道卿其若稽古典敬授民時勸彼東嶠之民勤於南  
畝之事茂用和氣迄用康年時乃之休惟朕以懌

至元改元赦

中統五年八月

王鶚

應天者惟以至誠拯民者莫如實惠朕以菲德獲承慶  
基內難未戢外兵復戢夫豈一日于今五年賴天地之  
畀矜暨祖宗之垂裕凡我同氣會于上都雖此日之小  
康敢朕心之少肆比者星芒示儆雨澤愆常皆闕政之  
所繇顧斯民其何罪宣布惟新之令溥施在宥之仁於  
戲否往泰來迓續亨嘉之會鼎新革故正資輔弼之良

建國號詔

至元八年十一月

圖克坦公履

誕膺景命奄四海以宅尊必有美名紹百王而紀統肇

從隆古匪獨我家且唐之為言蕩也堯以之而著稱虞  
之為言樂也舜因之而作號馴至禹興而湯造互名夏  
大以殷中世降以還事殊非古雖乘時而有國不以義  
而制稱為秦為漢者蓋從初起之地名曰隋曰唐者又  
即始封之爵邑是皆徇百姓見聞之狃習要一時經制  
之權宜槩以至公得無少貶我太祖聖武皇帝握乾符  
而起朔土以神武而膺帝圖四振天聲大恢土宇興圖  
之廣歷古所無頃者耆宿詣庭奏章伸請謂既成於大

業宜早定於鴻名在古制以當然於朕心乎何有可建  
國號曰大元蓋取易經乾元之義茲大治流形於庶品  
孰名資始之功予一人底寧於萬邦尤切體仁之要事  
從因革道協天人於戲稱義而名故匪為之溢美乎休  
惟永尚不負於投艱嘉與敷天共隆大號

頒授時歷詔

至元十七  
年六月

李謙

自古有國牧民之君必以欽天授時為立治之本黃帝  
堯舜以至三代莫不皆然為日官者皆世守其業隨時

考驗以與天合故厯法無數更之弊及秦滅先聖之術  
每置閏於歲終古法蓋殫廢矣由兩漢而下立積年日  
法以為推步之准因仍沿襲以迄于今天運流行不  
息而欲以一定之法拘之未有久而不差之理差而必  
改其勢有不得不然者今命太史院作靈臺制儀象日  
測月驗以考其度數之真積年日法皆所不取庶幾胎  
合天運而永終無弊乃者新厯告成賜名曰授時厯自  
至元十八年正月一日頒行布告遐邇咸使聞知

欽定四庫全書

元大類  
卷九

清冗職詔

至元二十  
二年七月

李謙

惟我祖宗肇造區夏雖中書已嘗建立而官制未暇舉  
行迨予圖大以宅中思欲繼志而述事集儒臣之公議  
法前代之尋章爰立省部院臺以正朝廷綱紀自疆土  
極照臨之遠而省臺有內外之分日益月增官冗人濫  
嘗勅有司而澄汰意能舊制之遵承比聞近侍之言謂  
益曩時之弊彼不勝重任有壅上聞苟尚蹈匪尋時惟  
予咎其清冗職用復前規於戲官不必備惟其人朕恪

守已成之憲爾尚克勤于乃事卿永肩圖報之心

加封五嶽四瀆四海詔

至元二十八年二月

閻復

朕惟名山大川國之秩祀今嶽瀆四海皆在封宇之內  
民物阜康時惟神休而封號未加無以昭答靈貺可加  
上東嶽為天齊大生仁聖帝南嶽司天大化昭聖帝西  
嶽金天大利順聖帝北嶽安天大貞玄聖帝中嶽中天  
大寧崇聖帝加封江瀆為廣源順濟王河瀆靈源弘濟  
王淮瀆長源溥濟王濟瀆清源善濟王東海為廣德靈

會王南海廣利靈孚王西海廣潤靈通王北海廣澤靈祐王仍各遣官詣祠致告以稱朕敬恭神明之意

興師征江南諭行省官軍詔

王構

爰自太祖皇帝以來彼宋與我使介交通殆非一次彼此曲直之事亦所共知不必歷舉迨我憲宗之世朕以藩職奉命南伐師次鄂渚彼賈似道遣宋京詣我近臣博都歡前河南路經畧使趙壁請罷兵息民願奉歲幣于我朕以國之大事宗親在上必須入計用報而還即



位之始追憶是言乃命翰林侍講學士郝經等奉書往聘蓋為生靈之計也古者兵交使在其間惟和與戰宜嗣報音其何與於使哉而乃執之卒不復命至如留此一二行李於此何損於彼何益以致師出連年邊境之間死傷相籍係累相屬皆彼宋自禍其民也襄陽被圍五年旅拒王師義當不貸朕先有成命果能出降許以不死是既降附之後朕不食言悉全其命冀宋悔過或啓令圖而乃迷執罔有悛心所以問罪之師有不能已

者今遣爾等水陸並進爾等當布告遐邇夫以天下為  
事爰及干戈自古有之無辜之民初無與焉若彼界軍  
民官吏人等去逆效順與衆來降或別立奇功者驗等  
第官資遷擢其所附軍民宜嚴敕將士毋得妄行殺掠  
父母妻孥家口毋致分散仍加賑給令得存濟其或固  
拒弗從及迎敵者俘戮何疑

即位詔

至元三十一年四月

王構

朕惟太祖聖武皇帝受天明命肇造區夏聖聖上承光

熙前緒迨我先皇帝體元居正以來然後典章文物大  
備臨御三十五年薄海內外罔不臣屬宏規遠畧厚澤  
深仁有以衍皇元萬世無疆之祚我昭考早王儲位德  
盛功隆天不假年四海缺望顧惟眇質仰荷先皇帝殊眷  
往歲之夏親授皇太子寶付以撫軍之任今春宮車遠  
馭奄棄臣民乃有宗藩昆弟之賢戚畹官僚之舊謂祖  
訓不可以違神器不可以曠體承先皇帝夙昔付託之  
意合辭推戴誠切意堅朕勉徇所請於四月十四日即

皇帝位尚念先朝庶政悉有成規惟慎奉行罔敢失墜  
更賴宗親勲戚左右忠良各盡乃誠以輔台德

五鎮山加封詔

大德三年

王構

朕惟九州之有鎮山三代以為常祀嶽瀆四海加封爰  
自于先朝疆理羣方同饗宜遵於舊制乃眷粹靈之懿  
其增號秩之華今加上東鎮沂山曰元德東安王南鎮  
會稽山曰昭德順應王西鎮吳山曰成德永靖王北鎮  
盟巫閭山曰貞德廣寧王中鎮霍山曰崇德應靈王地

德恒安功協成于奄奠民生咸阜治浸格于隆平仍命所在有司以時致祭務盡精嚴尚冀歆承益孚嘉貺

建儲詔

大德九年六月

閻復

惟我太祖聖武皇帝世祖聖德神功文武皇帝規模宏遠預建儲嗣式與古合朕恪遵祖宗成憲允協昆弟僉言立嫡子德壽為皇子茲有日矣比者遠近宗親復以為請又中書百司及諸老臣請授冊寶昭示中外朕俯從衆願於今月五日授以皇太子寶所有冊禮其如常

制屬茲盛舉宜布新恩於戲慶衍無疆既正名於國本  
仁同一視尚均福於黎元

即位詔

大德十一年五月

閻復

昔我太祖皇帝以武功定天下世祖皇帝以文德洽海  
內列聖相承丕衍無疆之祚朕自先朝肅將天威撫軍  
朔方殆將十年親御甲冑力戰却敵者屢矣方諸蕃內  
附邊事以寧遽聞宮車晏駕乃有宗室諸王貴戚元勳  
相與定策於和林咸以朕為世祖曾孫之嫡裕皇正派

之傳以功以賢宜膺大寶朕謙讓未遑至于再三還至上都宗親大臣復請於朕間者姦臣乘隙謀為不軌賴祖宗之靈母弟愛育黎拔力八達稟命太后恭行天罰內難既平神器不可久虛宗祧不可乏祀合辭勸進誠意益堅朕勉徇輿情於五月二十一日即皇帝位任大守重若涉淵冰屬嗣服之云初其與民而更始於戲丕承丕顯敢忘持守之心于蕃于宣勉效忠勤之力共毗新政聿底隆平

行銅錢詔

至大二  
年十月

姚燧

錢幣之法其來遠矣三代以降沿革不常世祖皇帝建  
元之初頒行交鈔以權民用已有錢幣兼行之意蓋錢  
以權物鈔以權錢子母相資信而有證今鈔法一新期  
於公私兩利重惟經久之計必復鼓鑄之規

至大三年十月赦

姚燧

朕自嗣守丕基致孝太室奉上玉冊寶加謚太祖為法  
天啟運聖武皇帝光獻翼聖皇后睿宗仁孝景襄皇帝



顯懿莊聖皇后世祖聖德神功文武皇帝昭睿順聖皇  
后裕宗文惠明孝皇帝徽仁裕聖皇后順宗昭聖衍孝  
皇帝成宗欽明廣孝皇帝貞慈靜懿皇后于斯之時宜  
降德音誕告天下猶恐數赦或賊良民今因西北叛王  
不受正朔五十餘年其子徹伯爾蓋愆前人盡率部衆  
歸命闕庭及庫庫楚謀為非覲未忍置理刑以輕典與夫  
崇建大利上為列聖報德冥冥下為生民祈福昭昭者  
亦既成功皆我聖母之德之致已於此月五日奉玉冊

玉寶上尊號曰儀天興聖慈仁昭懿壽元皇太后屬大慶禮成宜敷渙號以新民聽於戲凡在有司一乃心力以輔予治期底隆平

即位詔

至大四  
年三月

姚燧

惟昔先帝事皇太后撫朕眇躬孝友天至由朕同託順考遺體重以母弟之嫡加有削平內難之功於其踐阼曾未踰月授以皇太子寶領中書令樞密使百揆機務聽所總裁于今五年先帝奄棄天下勲戚元老咸謂大

寶之繩既有成命非與前聖賓天而始徵集宗親議所  
宜立者比當稽周漢晉唐故事即正宸極朕以國恤方  
新誠有未忍是用經時今則上奉皇太后勉進之命下  
徇諸王勸戴之勤三月十八日於大都大明殿即皇帝  
位凡尚書省誤國之臣先已伏誅同惡之徒亦已放殛  
百司庶政悉歸中書命丞相特們德爾平章政事諤勒哲  
李道復等從新極治其可為今法程拯民急者具如左  
方於戲凡爾有官君子皆古所謂治天職食天祿者宜

一心力欽乃攸司無替朕命

行科舉詔

皇慶二年十一月

程鉅夫

惟我祖宗以神武定天下世祖皇帝設官分職徵用儒  
雅崇學校為育才之地議科舉為取士之方規模宏遠  
矣朕以眇躬獲承丕祚繼志述事祖訓是式若稽三代  
以來取士各有科目要其本末舉人宜以德行為首試  
藝則以經術為先詞章次之浮華過實朕所不取爰命  
中書參酌古今定其條制其以皇慶三年八月天下郡

縣舉其賢者能者充賦有司次年二月會試京師中選者朕將親策焉於戲經明行修庶得真儒之用風移俗易益臻至治之隆

即位詔

延祐七年三月

張士觀

洪惟太祖皇帝膺期撫運肇開帝業世祖皇帝神機睿畧統一四海以聖繼聖迨我先皇帝至仁厚德涵濡羣生君臨萬國十年于茲以社稷之遠圖定天下之大本協謀宗親授子冊寶方春宮之與政遽昭考之賓天諸

王貴屬元勲碩輔咸謂朕宜體先皇帝付託之重皇太后擁佑之慈既深繫於人心詎可虛於神器合辭勸進誠意交孚乃於三月十一日即皇帝位於大明殿誕受維新之命庸推在宥之恩尚念祖宗丕緒持守維艱萬幾之繁罔敢暇逸更賴遠近勲戚左右臣鄰咸乃一心以輔予治

至治改元詔

元明善

朕祇遵詒謀獲承丕緒念付託之惟重顧繼述之敢忘

爰以延祐七年十二月初二日被服衰冕恭詣于太廟  
既大禮之告成宜普天之均慶屬茲逾歲用易紀元于  
以導天地之至和于以法春秋之謹始可改延祐八年  
為至治元年於戲奉先思孝式昭報本之誠發政施仁  
聿廣錫民之福

命拜珠為右丞相詔

至治二年十二月

袁桷

帝王之職在論一相于以表正百司綱領庶績朕纘承  
丕緒厲精圖治然而澤有所未洽政有所未舉豈委任

之道有遺闕歟今特命中書左丞相拜珠為開府儀同  
三司上柱國錄軍國重事中書右丞相監修國史一新  
機務使邪正異途海寓乂寧以復中統至元之治於戲  
朝廷既正著端本澄源之功風俗斯醇廣摩義漸仁之  
化

諭安南國詔

曹元用

諭安南國世子陳日熿我國家誕膺景命撫綏萬邦德  
澤普及靡間夷夏乃者先朝奄棄臣民朕以裕皇嫡孫



為宗戚大臣之所推戴爰自太祖皇帝肇基之地入承  
天叙於至治三年九月四日即皇帝位遂以甲子歲為  
泰定元年今遣亞中大夫吏部尚書馬合謀奉議大夫  
禮部郎中楊宗瑞賫詔往諭爾國賜爾授時厯一帙惟  
乃祖乃父修貢內附有年矣我國家遇卿甚厚以占城  
守臣上表稱卿之邊吏累發兵相侵朕為之惻然于中  
不知卿何為至是豈信然耶朕君臨天下視遠猶邇務  
輯寧其民俾各得其所卿其體予至懷戒飭士衆慎保

欽定四庫全書

元文類  
卷九

又民俾毋忘爾累世忠順之意

即位改元詔

虞集

洪惟我太祖皇帝肇造區夏世祖皇帝混一海宇爰立定制以一統緒宗親各授分地勿敢妄生覬覦此不易之成規萬世所共守者也世祖皇帝之後成宗皇帝武宗皇帝仁宗皇帝英宗皇帝以公天下之心以次相傳宗王貴戚咸遵祖訓至於晉邸具有盟書願守藩服而與賊臣特克實額森特穆爾等潛通陰謀冒干寶位使英

皇不幸罹于大故朕兄弟播越南北備歷艱險臨御之事豈獲與聞朕以叔父之故順承惟謹于今六年災異迭見權臣道拉實諤卜都拉等專擅自用疏遠勲舊廢棄忠良變亂祖宗法度空府庫以私其黨類大行上賓利於立幼顯握國柄用成其姦宗王大臣以宗社之重統緒之正協謀推戴屬于眇躬朕以菲德宜俟大兄固讓再三宗戚將相百僚耆老以為神器不可以久虛天下不可以無主周王遼隔朔漠民庶惶惶已及三月誠

懇迫切朕姑從其請謹俟大兄之至以遂朕固讓之心  
已於致和元年九月十三日即皇帝位於大明殿其以  
致和元年為天厯元年可大赦天下於戲朕豈有意於  
天下哉重念祖宗開創之艱恐隳大業是以勉徇輿情  
尚賴爾中外文武臣僚協心相予輯寧億兆以成治功

即位詔

天厯二年八月十五日

虞集

惟昔上天啟我太祖皇帝肇造帝業列聖相承世祖皇  
帝既大一統即建儲貳而我裕皇天不假年成宗入繼

才十餘載我皇考武宗皇帝歸膺大寶克享天心志存  
不私以仁廟居東宮遂嗣宸極甫及英皇降割我家晉  
邸違盟構逆據有神器天示譴告竟隕厥身於是宗戚  
舊臣協謀以舉義正名以討罪揆諸統緒屬在眇躬朕  
興念大兄播遷朔漠以賢以長厯數宜歸力拒羣言至  
于再四乃曰艱難之際天位久虛則衆志弗固恐隳大  
業朕雖從請而臨御秉初志之不移是以固讓之詔始  
頒奉迎之使已遣尋命喇特納實哩雅克特穆爾奉皇

帝寶璽遠迓于途受寶即位之初即遣使授朕皇太子  
寶朕幸釋重負寶獲素心乃率臣民北迎大駕而先皇  
帝跋涉山川蒙犯霜雪道里遼遠自春徂秋懷艱阻於  
歷年望都邑而增慨徒御弗慎屢與節宣信使往來相  
望於道路彼此思見交切於衷懷八月一日大駕次翁  
果察圖朕欣瞻對之有期獨兼程而先進相見之頃悲  
喜交集何數日之間而宮車弗駕國家多難遽至於斯  
念之痛心以夜繼旦諸王大臣以為祖宗基業之隆先

帝付託之重天命所在誠不可違請即正位以安九有  
朕以先皇帝奄棄方新推怛何忍銜哀辭對固請彌堅  
執誼伏闕者三日皆宗社大計乃以八月十五日即皇  
帝位于上都可大赦天下於戲戡定之餘莫急乎與民  
休息丕變之道莫大乎使民知義亦惟爾中外大小之  
臣各究乃心以稱朕意

親祀南郊赦

至順元年  
十二月

虞集

朕膺昊天之成命承聖祖之貽謀祇續丕基于今三載

統萬幾之兢業思兆姓之雍熙式舉禮文聿嚴報祀爰  
以今年十月初四日躬服袞冕致明禋于南郊尊我太  
祖法天啓運聖武皇帝配享上帝方至誠之孚格嘉景  
眴之旋臻宜施曠蕩之恩用洽溥天之慶於戲永言配  
命克肩昭事之心一視同仁益廣鴻寧之福

即位詔

虞集

洪惟太祖皇帝啟闢疆宇世祖皇帝統壹萬方列聖相  
承法度明著我虞覲皇帝入繼大統修舉庶政動合成



法授大寶位于布延圖皇帝以及格根皇帝厯數之歸  
實當在我瑚土克圖皇帝濟雅圖皇帝而各播越遼遠時  
則有若雅克特穆爾建義效忠戡平內難以定邦國協恭  
推戴濟雅圖皇帝登位之始即以讓兄之詔明告天下  
隨奉璽紱遠迓瑚土克圖皇帝朔方言旋奄棄臣庶濟雅  
圖皇帝薦正宸極仁義之至視民如傷恩澤霂霂無間  
遠邇顧育眇躬尤篤慈愛賓天之日皇后傳濟雅圖皇  
帝顧命於太師太平王右丞相達爾罕雅克特穆爾太保

浚寧王知樞密院事巴延等謂聖體彌留益推固讓之  
初志以宗社之重屬諸大兄瑚土克圖皇帝之世嫡乃遣  
使召諸王宗親以十月一日來會大都與宗王大臣同  
奉遺詔揆諸成憲宜御神器以至順三年十月初四日  
即皇帝位于大明殿可大赦天下於戲肆予冲人託于  
天下臣民之上任大守重若涉淵冰尚賴宗王大臣百  
司庶府交修乃職思盡厥忠嘉與億兆之民共保隆平  
之治



元文類卷九

欽定四庫全書

元文類卷十

元 蘇天爵 編

冊文

皇后冊文

王 磐

維至元十年歲次癸酉三月甲寅朔十三日丙寅皇帝  
若曰天地合德故能覆載萬物而不遺日月並明所以  
照臨六合而無外至哉夫婦之大義實配陰陽之兩儀  
咨爾皇后鴻吉哩氏戚里名家元勲貴族備儀率禮令

德來嬪自朕奉藩之初至于踐阼之日明識遠慮裨益  
宏多雖禕翟正位于長秋而典冊未光于大禮茲者文  
臣敷奏實應朕心今遣攝太尉中書右丞相安圖持節  
授爾玉冊寶章備物充庭式遵古典於戲恭順接下九  
族形雍睦之風儉素相高萬世衍靈長之福服茲寵命  
益懋徽猷

皇太子冊文

圖克坦公履

皇帝若曰咨爾皇太子珍戩仰惟太祖聖武皇帝遺訓

嫡子中有克嗣服繼統者預選定之是用立太宗英文  
皇帝以紹隆丕構自時厥後不為顯立冢嫡遂啟爭端  
朕上承祖宗弘遠之規下協昆弟僉同之議乃從燕邸立  
爾為皇太子積有日矣比者儒臣敷奏國家定立儲嗣宜  
有冊命此典禮也今遣攝太尉中書左丞相巴延持節  
授爾玉冊金寶於戲聖武燕謀爾其奉承昆弟宗親爾  
其和協使仁孝顯於躬行可謂不負所託矣尚其戒哉  
式勿替朕命

太祖皇帝加上尊號冊文

王 構

維至大二年歲次己酉某月某日孝曾孫嗣皇帝臣某  
謹再拜稽首言伏以恢皇綱廓帝紘建萬壽無疆之業  
鋪宏休揚偉績遵累朝已定之規式當繼統之元蓋有  
稱天之誅孝弗忘于率履制庸謹于加崇欽惟太祖聖  
武皇帝陛下淵量聖姿睿謀雄斷沛仁恩而濟屯厄振  
羈策以馭豪英惟解衣推食于初年見君國于民之大  
略玄符顯握諸部悉平黃鉞載麾百城隨下裔土兼收



于夏孽餘波克殄于金源蕩蕩乎無能名迹遠追于湯  
武灝灝爾其為訓道允協于唐虞根深峻嶽而維者四  
焉囊括殊封而統之一也肆予小子承此丕基兩祗見  
於太宮恒僊臨于端扆祚垂鴻兮錫裕尚期昭報之申  
牒鏤玉以增輝敢緩彌文之舉謹遣某官某奉玉冊玉  
寶加上尊謚曰法天啟運聖武皇帝廟號太祖伏惟威  
靈昭假景貺潛臻闡繹吾元與天並久

世祖皇帝謚冊文

王構

維至元三十一年歲次甲午五月庚戌朔越九日戊午  
孝孫嗣皇帝臣某再拜稽首言臣聞繼志述事非盡孝  
無以盡其誠表行誅功非定謚無以稱其實肆邦彛之  
具舉維天道之協從欽惟先皇帝膺錄受圖體元立統  
蚤從藩邸茂著徽稱為治之基有常經國之略則遠役  
用衆智獨斷于衷總攬萬幾如指諸掌內朝廷外侯牧  
等威迭降罔不適中先教化後刑名本末相循亦皆有  
序在御迨踰於三紀推尊合冠於百王若夫惠及困窮

恩加降附慎終如始每存好生之心保小以仁特示包  
荒之量擴盛猷之鴻邇沛膏澤之醇醲方其泰運漸亨  
戢濟多難離網復綴混一四方傳檄而氛祲開渙號而  
方維定乾旋坤轉不足以喻其機雷厲風飛不足以比  
其捷至於嘉言博采惟典謨訓誥是師諸藝畢延盡陰  
陽圖緯之學考音律以創字畫參古今以制禮儀振耀  
威靈肅陳兵衛白旄黃鉞持則親巡犀甲雕弧止於不  
用其聖德弗可及已神功茂以尚焉蓋文之所加者深

武之所服者大是用升崇吉祔揆卜剛辰謹遣攝太尉  
臣鄂都岱奉冊寶上尊謚曰聖德神功文武皇帝廟號  
世祖伏惟睿靈俯垂昭鑒思皇多祐錫羨無疆

皇太后冊文

陳儼

維至元三十一年歲在甲午十一月丁未朔皇帝臣某  
謹稽首再拜言曰臣聞自家而國治道必有所先立愛  
惟親君德莫加於孝況恩深於鞠我而禮重於正名歷  
代以來令儀可考人子之職所在天下之母宜尊恭惟

聖母聖善本乎天資靜專法乎地道的上以奉宗祏之重  
下以叙倫紀之常助我前人守卷耳憂勤之志保予冲  
子成思齊雖肅之風肆神器之有歸知孫謀之數定畀  
付雖由於厯數規模一出於庭闈是用率籲衆心章明  
鉅慶不勝拳拳大願謹奉冊寶上尊稱曰皇太后伏惟  
長信穆穆周宗綿綿備洛書之錫福燦慈極之儀天瑤  
圖寶運于萬斯年誠歡誠忭稽首再拜

睿宗皇帝加上謚冊文

劉 賡

伏以詣泰壇而請命有稱天以誅之文薦清廟而致嚴  
蓋在昔相承之典剛辰爰卜遺美載揚欽惟睿宗景襄  
皇帝孝友溫恭聰明濬哲屬我家肇造于朔土佐聖祖  
邁征于四方逮大討之奉行致皇威之遠暢金源假兩  
河之息天水渝通好之盟遂移秦隴之師爰有褒斜之  
舉既平南鄭順流而東再涉襄江自上而下乃眷三峯  
之捷實開萬世之基唇既亡而齒亦寒號可伐而虞不  
臘適英文之違豫圖中夏之底寧母作神羞請以身代

爰俟金縢之啟已知寶祚之歸迪我後人紹茲明命徽  
稱顯號雖已擬諸形容玉檢金泥尚未遑於潤色奉玉  
冊玉寶加上尊謚曰仁聖景襄皇帝廟號睿宗伏惟端  
臨宸座誕受鴻名億萬斯年永錫繁祉

順宗皇帝謚冊文

程鉅夫

孝子嗣皇帝臣某謹再拜稽首言曰臣聞顯親所以為  
子追遠所以厚民矧必百世祀而位弗隆為天子父而  
養弗逮是宜稱秩以達純誠欽惟皇考皇帝淵穆有容

神明莫測文孫文子鍾至愛於兩宮宜君宜王膺具瞻  
於四海當璧之祥未卜棄屣之跡已遙興言欲報之恩  
昊天罔極對越有成之命夙夜惟寅昭哉玄德之升聖  
矣生知之異衍莫衍於昌後嗣而有天下孝莫孝於配  
前烈而茂本支念茲繼體之初益切中心之慕謹遣攝  
太尉某官某奉玉冊玉寶上尊謚曰昭聖衍孝皇帝廟  
號順宗伏惟明明降鑒序于祖宗攸躋攸寧永錫祚胤

皇后冊文

程鉅夫



維皇慶二年歲次癸丑三月辛卯朔越十有六日丙午  
皇帝若曰朕荷天地祖宗之祐皇太后之訓嗣大厯服  
思底于治必立元配表正六宮咨爾鴻吉哩氏實我家  
世戚嫡嗣所自出積德流慶肆啟爾來嬪于朕淑慎孝  
恭令譽昭聞承命慈闈爰正爾位今遣攝太尉中書右  
丞相圖古勒授爾玉冊玉寶命爾為皇后惟天地定位  
萬物以生日月並照萬國以明君后合德萬化以成上  
以事上帝奉宗廟下以親九族正萬邦為朕內助惟爾

之賢其永念厥德履中體順俾聖母暨予一人以寧豈  
惟爾嘉天亦永相念爾共享有國欽哉

皇帝尊號玉冊文

姚燧

維至大二年正月乙酉朔越七日辛卯皇太子中書令  
樞密使臣某謹率中外文武百僚頓首頓首謹言昔我  
世祖既平炎趙質之於書幅員廣長振古無倫覆燾之  
下八紘萬國莫敢不庭何獨一王西北岸然憑道阻修  
方命正朔德綏之而不摯威董之而不警夫豈不能聲

罪致罰深入其地終以聖人親其宗親包荒有年成宗  
繼序憤久驚頑天鑒昭明於裕皇孫獨異陛下授以太  
祖皇帝信寶撫軍漠北是固以張足付神器之本時未  
及冠承命即行其視萬里莽闐寒冽之鄉不遠不難如  
堂適庭至則獎厲諸軍修明法志簡拔果毅均苦分勞  
解衣燠寒推食飫飢洸洸汔汔士氣日作睿算伐謀待  
寇歲至奪人以先身踐戎行霆馳電擊大北其羣虛已  
不矜日慎一日始終十年不狃屢勝狂狡不懲悉銳來

加當以選鋒伺間出奇盡襲輜重彷彿無歸度不能軍  
耄倪纍纍降口百萬致茲牧寧平四十年未靖之梗成  
兩祖宗未究之志天下之人聞其風聲思覩天光者顒  
顒翹翹九圍一心握是乾符歸正宸極弛武事之夙習  
洽新化以文治立愛自親曾未旬浹上尊太后問安以  
時下建儲宮庶政是先又舉列聖未遑之典欽崇元祀  
玉瓚黃流薦裸太室還蹕龍興徘徊太祖龍旂九旂斲  
金于斯肇基帝業為城中都又以孔子垂範百王將二

千年而顯謚未稱加大成於至聖文宣王上立勞于軍  
與凡庭臣悉大賚之間歲不登既賑既恤虞施未博民  
罹罪罟再肆大宥至德難名赫赫巍巍惟天為大掛一  
漏萬井觀如斯求可盡臣下歸美報上者惟是微稱謹  
奉玉冊玉寶上尊號曰統天繼聖欽文英武大章孝皇  
帝伏惟陛下立心天地立極生民茂對鴻名于億萬年

皇太后尊號玉冊文

姚燧

維至大三年歲次庚戌冬十月甲辰朔越五日戊申嗣

皇帝臣某臣伏思顯考順宗未臨海寓眇眇小子託其遺體顧踐丕基惟事聖母養以天下何無不有何欲不臻而隆名盛典辭未見俞非臣所以表微忱酬大德也欽惟皇太后陛下貞順而齊肅淵哲而剛明居常處變愛威異施臣在先朝受詔漠北往撫諸軍可謂遠役以義割恩愆愆其行迨軋河陽永懷彌切親至五臺禱于佛乘尚憑陰臨早遂振旅殿閣是崇竊覲用昭旋聞國恤併日馳赴邪謀方興授冊儲皇曾不再日掃清宮掖

待臣之來畀付神器自非睿斷安救內訌往歲鑾輅再  
輒五臺淨供大修以畢夙願極心為臣天燾地持日居  
月諸其大其明非言所喻詩之言曰母氏劬勞推之眇  
末咻仁煦慈百倍為艱圖以報塞惟崇顯號者強而名  
之庶幾聖德昭明天下是用類于上帝禋于太室奉玉  
冊玉寶上尊號曰儀天興聖慈仁昭懿壽元皇太后伏  
惟皇太后陛下慶躋莫上之尊福衍無疆之厯菲躬是  
保慈訓是承

皇太子冊文

閻復

皇帝若曰祖宗聖緒恭承丕顯之謨兄弟懿親宜正元良之號立天下之大本示天下以至公咨爾皇太子阿裕爾巴里巴特喇德器淵深英姿玉粹武奮清宮之績文參定策之勲豈特華萼交輝之情式相好矣其在鳬鷖守成之治須汝贊之故於連枝同氣之間付以監國撫軍之任慈上承於母意蓋允出於朕心已於六月朔旦面授爾皇太子金寶今復遣攝太尉丞相塔斯巴哈持節授爾



玉冊維寵命之薦膺尚謙恭而自牧益盡寧親之孝益勤事上之忠以敦九族內睦之風以衍億祀無疆之慶

成宗皇帝謚冊文

張士觀

嗣皇帝臣某謹再拜稽首言曰臣聞稱天以誅表名實之至公法日而名庶形容之可擬維帝王之有謚蓋今古之彛章欽惟大行皇帝稟上聖之資撫重熙之運當裕考龍升之後承世皇燕翼之謀武威肅鎮於遐荒文德誕敷於華夏業業謹盈成之戒愉愉盡孝敬之誠罷

勤遠之兵邊釁弭而苗頑格遣直指之使皇澤宣而民  
瘼除九族形敦睦之風萬國洽隆平之治爰酌奉常之  
儀用昭告祔之文謹遣攝太尉某官某奉冊寶上尊謚  
曰欽明廣孝皇帝廟號成宗伏惟睿靈在天孚鑒逮下  
茂膺典冊錫美邦家

仁宗皇帝謚冊文

張士觀

維延祐七年歲次庚申八月丁未朔粵十日丙辰孝子  
嗣皇帝臣某謹再拜稽首言臣聞觀其謚而知其行著

王者之丕稱裡于廟而誅于郊實邦家之彞典維天地之大莫能擬議而臣子之情宜極形容爰體至公式揚景鑠欽惟大行皇帝聰明冠古勇智自天初大德之陟遐生內覺於不測乃從潛邸獨運聖謨正神器於幾危定乾維而重構豐功盛烈奮立一時偉望英聲揚溢四海尋被武皇之歷試納于大麓以弗迷由母弟之懿親膺元良之重寄取法裕廟主鬯之道隆奉養東朝因心之孝至及嗣歷服益見猷為日恒月升廓昭代文明之

治海涵春照惟聖人博愛之仁至於敦勸農桑不嗜田獵每覆奏於庶獄必惻怛於宸衷肇設制科以待天下之士特旌死節以勵天下之忠臨御十年始終一德身衛斯文而不倦人由其道而莫知克謹持盈諒多遺美屬升崇於吉祔用祇薦於鴻名上以慰在天之靈下以協造庭之請是諷剛日備舉緝儀謹遣攝太尉某官某奉玉冊玉寶上尊謚曰聖文欽孝皇帝廟號仁宗伏冀睿靈俯垂歆鑒流光有永錫羨無疆

英宗皇帝謚冊文

袁 桷

伏以瑤圖纘緒神已御於鼎湖玉冊揚休禮宜升于太  
室悼降年之不永儼立政以如新爰述徽猷以傳信史  
欽維大行皇帝文明天縱剛健日嚴辨奸邪於嗣位之  
初彤庭祇畏廣儀注於熙朝之際清廟肅雝絕封勅以  
杜儉人申憲章以勵多士罰茲無赦令必惟行君臨三  
載而有成知周萬物而莫隱豈運逢艱否大命靡終然  
號謹追崇尊名是著謹遣攝太尉某官某奉玉冊玉寶

上尊號曰睿聖文孝皇帝廟號英宗伏惟炳靈有赫歆  
格無違祔于新宮以妥以宜

皇后冊文

袁桷

皇帝若曰在昔正始之道必先內治于以奉承宗祧化  
成天下朕嗣大歷服祗循憲章宜資配助用彰位號咨  
爾皇后鴻吉哩氏淑慎柔嘉遵道是行輔佐王邸謙抑  
自持實生元子國本斯建興龍重鎮介于紹封粵若臨  
御之初贊畫計慮厥相維多正位中宮天人協祥今遣

攝太尉中書右丞相舒瑪爾節授爾玉冊寶章坤順承天  
人道攸則表正母儀萬邦是觀維躬儉節用則徽音是  
嗣惟求賢審官則私謁靡干匡朕德格朕心實為有賴  
詩書所稱罔專美于前代噫敬厥初終有慶尚其念哉  
以膺爾景命


明宗皇帝謚冊文

虞集

臣聞統必有宗生嘗得以致其讓廟必有主歿思所以  
尊其名稽古考文宜天錫誅欽惟先皇帝夙秉勇智惟

時元良體傳次之成言避謳歌而逃身居絕域多  
歷於歲年而義動遠人樂為之先後德威孔著未堪大  
業之艱貞事變非常猶閔生靈而慎動庶來蘇於徯戴  
爰戡定以奉迎已謹清宮俄虛黃屋臣民寡祐永遺患  
澤之敷施天日有靈尚想神明之如在禮嚴升祔誠備  
顯揚謹遣攝太尉某官某奉玉冊玉寶上尊謚曰翼獻  
景孝皇帝廟號明宗伏冀睿慈俯回歆假克綏丕祚垂  
裕無疆





元文類卷十

欽定四庫全書

集部

元文類卷十二

詳校官通政使<sub>臣</sub>夢吉

助教<sub>臣</sub>常循覆勘

總校官庶吉士<sub>臣</sub>朱鈐

校對官典簿<sub>臣</sub>郭祚熾

謄錄監生<sub>臣</sub>劉能

欽定四庫全書

元文類卷十一

元 蘇天爵 編

制

加封孔子制

大德十一年九月

閻 復

蓋聞先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也朕纂承丕緒敬仰休風循治古之良規舉追封之盛典加號大成至聖文宣王遣使闕里祀以太牢

於戲父子之親君臣之義永惟聖教之尊天地之大日月之明奚罄明言之教尚資神化祚我皇元

加封孔子父母制

至順元年

謝端

闕里有家系出神明之胄尼山請禱天啓聖人之生朕聿觀人文敦求往哲惟孔氏之有作集羣聖之大成原道統則堯授舜傳之周文王論世家則契至湯下逮正考甫其明德也遠矣故生知者出焉有開必先克昌厥後如太極之生天地如鉅海之有本源雲仍既襲於上

公之封考妣宜視夫素王之爵於戲君子之道考而不  
繆建而不悖予以敦典而敘倫宗廟之禮愛其所親敬  
其所尊予以報功而崇德尚篤其慶以相斯文齊國公  
叔梁紇可加封啓聖王魯國太夫人顏氏可封啓聖王  
夫人

封宣聖夫人制

虞集

我國家惇典禮以彌文本閨門以成教迺睠素王之廟  
尚虛元姬之封有其舉之斯為盛矣大成至聖文宣王

妻元官氏來嬪聖室垂裕世家籩豆出房因流風於殷  
禮琴瑟在御存燕樂于魯堂功言邈若於遺聞儀範  
儼乎其合德作爾禕衣之象稱其命鼎之銘噫秩秩彝  
倫吾欲廣闢睢鵲巢之化皇皇文治天其興河圖鳳鳥  
之祥可特封大成至聖文宣王夫人

追封孟子父母制

延祐三年十月

張士觀

朕惟繇孔子至於孟子百有餘歲而道統之傳獨得其  
正雖命世亞聖之才亦資父母教養之力也其父夙喪

母以三遷之教勵天下後世推原所自功莫大焉稽諸  
往代實闕褒崇夫功大而位不酬實著而名不正豈朕  
所以致懷賢之意哉肆頒寵命永賁神休可追封其父  
為邾國公母為邾國宣獻夫人

追封伯夷叔齊制

閻復

蓋聞古者伯夷叔齊逃孤竹之封甘首陽之餓讓爵以  
明長幼之序諫伐以嚴君臣之分可謂行義以達道殺  
身以成仁者也昔居北海之濱遺廟東山之上休光垂



乎千載餘澤被于一方永懷孤峻之風庸示褒崇之典  
於戲去宗國而辭周粟曾是列爵之可縻揚義烈以  
激清塵期於世教之有補可追封伯夷為昭義清惠公  
叔齊崇讓仁惠公

封周子為道國公制

霍希賢

蓋聞孟軻既沒道失其傳孔子微言人自為說諒斯文  
其未喪有真儒之間生濂溪周惇頤秉元氣之至精  
紹絕學於獨得圖太極而妙斡萬化著通書而同歸一

誠俾聖教燦然復明其休功尚其不泯朕守成繼體貴  
德尊賢追念前修久稽彝典已從廟廷之祀盍疏鄉國  
之封於戲霽月光風想清規之如在玄袞赤紱冀寵命  
之斯承

楊庸教授三氏子孫制

中統元年九月

楊果

孔氏顏孟之家皆聖賢之後也自兵亂以來往往失學  
甘為庸鄙朕甚憫焉今以進士楊庸教授孔氏顏孟子  
弟務要嚴加訓誨精通經術以繼聖賢之業

許衡為懷孟教官制

楊果

咨爾許衡天資雅厚經學精專大凡講論之間深得聖  
賢之奧受罰者恐陳君所短為盜者畏王烈之知所在  
向風真堪正俗可令於懷孟等處選揀子弟俊秀者舉  
歸教育取作範模再令董子惟前有傳授之弟子重使  
王通門下皆經濟之名臣毋喪斯文以弼予治

降封宋主為瀛國公制

王磐

時逢屯否嶽瀆分疆運值休明乾坤一統春靖康之餘

裔擅吳會之興區遠隔華夏久睽鄰好我國家誕膺景  
命奄有多方炎風朔雪之鄉盡歸職貢若木虞淵之地  
靡不來庭歷六合而混同豈一方之獨異用慰徯蘇之  
望爰興問罪之師戈船飛渡而天塹無憑鐵馬長驅而  
松關失險宋主黜乃能察人心之向背識天道之推移  
正大姦誤國之誅斥羣小浮海之議決謀宮禁送款軍  
門奉章奏以祈哀率親族而入覲是用昭示大信度越  
翼章位諸台輔以上公之貴可封開府儀同三

司檢校司徒瀛國公

丞相史天澤贈謚制

劉元

周制以八統詔王必先敬故漢官以列爵馭下亦自報  
功古有彝章朕茲申勸故開府儀同三司平章軍國重  
事中書左丞相史天澤性資貞亮器宇沈雄自開國以  
將三軍妙契淮陰之略至分茅而推千乘甚高孤竹之  
風况結知於累朝迨總戎于四紀及朕纂承之始克膺  
輔相之良內秉國均兼筦機于右府外清邊陲幾授鉞

于齋壇可謂威惠之交乎抑亦忠勤之備至繼以荆蠻  
之蠹重煩汴省之趨惟時壯猷行策功而飲至不圖晚  
志遽引年以謝歸申言齒德之尊端愈典刑之益命開  
府第協贊廟謀方就佚于尊壘復遺憂于邊閫冀資  
偉算用一遐甌顧上游之濟師方倚坐籌之勝愴中途  
之疾革莫收卧護之勲弗飾厥終曷旌乃績宜表出羣  
之行進登符六之階於戲國步方新天不憖遺于一老  
閔章加襚卿其永賁于九原營魂有知歆予異渥可贈

開府儀同三司太尉謚忠武公

太保劉秉忠贈謚制

李 樂

臣以忠孝而事上貴輸獻納之誠上以禮義而遇臣思  
篤始終之愛視死之日猶生之年故光祿大夫太保參  
領中書省事劉秉忠學窺天人識貫今古遂冲而有守  
安靜而無華昔侍潛藩稔聞高論適當三接之際懇上  
萬言之書蓋將舉天下而措諸安以戒為人主者果於  
毅朕嗣服而伊始卿盡力以居多蓋得卿實契于朕心

而獨朕悉知於卿意事皆有驗人匪他求周旋三十年  
不避其難剴切數百奏各中其理共成庶政方圖任于  
舊人誰謂昊天不憖遺於一老興言及此何日忘之再  
惟台輔之尊厥有泉局之賁是用錫之綸命峻一品之  
華階祿以袞衣躡三槐之正位復加顯號允答殊勲惟  
爾英靈識予哀寵可贈開府儀同三司太傅謚文貞  
公

左丞董文炳贈謚制

李 樂



折衝禦侮誠社稷之良臣崇德報功實國家之令典途  
雖殊於生死禮當極于哀榮故資大夫中書左丞僉書  
樞密院事董文炳王佐之才將家之子自出宰於劇縣  
嘗入侍於潛藩山路間關謁戎輅遠趨於六詔風濤洶  
湧扈龍舟首渡於三江迨予嗣服之年委以專征之任  
截彼淮浦至于海邦招降兩浙之新民撫定七閩之故  
地大小數百戰奮不顧身勤勞三十年厥有成績往者  
睢陽城下父已歿於兵鋒比來揚子橋邊男復終于王

事一門忠孝萬古芳香及茲幹事而回方以不次而待  
何言中路殲我良人蓋非卿孰佐于朕躬而獨朕悉知  
於卿意弗頒異數曷慰永懷其陞一品之榮以賁九泉  
之墜倘其有識歆此無窮可贈金紫光祿大夫平章政  
事謚忠獻公

丞相巴延贈謚制

閻復

天下大統不嗜殺則一之聖主弘功蓋必資於賢者昔  
在至元之際方隆混一之期有來命世之奇材懋建殊

常之偉績故太傅開府儀同三司錄軍國重事巴延崆峒孕秀列象騰精居政府則不動聲氣措泰山之安秉戎律則純乎仁義猶時雨之降當其聲鶴浦渝盟之罪總龍驤飛渡之師克廣世祖好生之心允獲宋人誠服之意衣冠不改市肆不易恩威普洽于三吳車書以混文軌以同聲教遂覃于百粵逮朕纂承之始益申推戴之誠永懷社稷之宗臣宜侈河山之高爵於戲曹侍中江南之役規摹一何小哉郭汾陽異姓而王崇報斯

亦至矣可贈宣忠佐命開濟功臣太師開府儀同三司  
追封淮安王謚忠武

丞相阿珠贈謚制

閻復

邊外開邊四達弗庭之域將門出將三持分閫之權緬  
思百戰之勞宜用九原之賁故光祿大夫中書左丞相  
兼都元帥贈開府儀同三司太尉追封并國公謚武宣  
阿珠英才間世勇略邁倫當先皇大理之征佐迺父雲  
南之役靖蠻荒而平交趾拔襄漢而下江南薦瘴揮戈

萬里若衽席之上龍驤飛渡三吳歸掌握之中贊成  
混一之圖式副元勲之號按禮寺易名之典加王章異  
等之恩於戲青史屢書諒騰芳之有永黃河如帶尚流  
慶於無窮可加贈推誠宣力保大功臣太尉開府儀同  
三司上柱國追封河南郡王謚武定

丞相錫津贈謚制

閻復

蕭曹翊漢素非閥閱之家房杜匡唐卒乏鈞衡之嗣  
眷先朝之碩輔綿累世之芳猷永懷弼亮之賢庸示褒

崇之禮太傅錄軍國重事開府儀同三司中書右丞相  
監修國史完澤之父故光祿大夫中書右丞相宣徽使  
錫津稟靈河嶽著象星辰應明良千載之期萃忠孝  
一門之慶梯天力競元戎奠鶉首之郊扶日功高奕葉  
應龍飛之運惟昔中書之草創歷陳治古之宏規位望  
冠於百僚利澤施於四海躬承世祖肇隆中統之不圖  
子侍裕皇復贊元貞之初政方倚具瞻之重宜昭先德  
之華維垣進秩於上台列爵仍疏於大國錫號著勲庸

之偉易名申節惠之文殊恩允出於朕心卹典非由於  
汝請表南宮雲臺之像既彰異渥於宗臣措天下泰山  
之安益助貞勤於上宰尚服休命永播英聲可特贈宣  
忠保德佐理功臣太師開府儀同三司中書右丞相追  
封秦益國公謚忠獻

丞相和爾果斯贈謚制

閻復

北方間氣寶生命世之材黃門清風益出登瀛之選慨  
英靈之已往當卹典之崇頒故光祿大夫中書右丞相

和爾果斯派接元勲慶鍾金德早躡鰲峰之首誕披雲  
漢之章開闢賢關為司徒而敷五教更張化瑟位冢宰  
以統百官恢揚累世之洪休新美至元之大政掄才如  
崔祐甫之廣潔已有張忠定之剛著績熙朝既闡文明  
之治疏封列國宜居禮義之鄉可贈保德協謀佐理功  
臣太師開府儀同三司追封齊魯國公謚文忠

翰林承旨王磐贈官制

王之綱

崇德報功恩靡忘於先正易名節惠體具載於勲章故



翰林學士承旨資德大夫知制誥兼修國史領集賢院  
事致仕王磐志大以剛識明而遠惟根本培植於內者  
確乎不拔故英粹發越於外者煥乎有文出處無愧於  
心窮達不易其守潛知逆黨星言發青社之謀明斥權  
姦露奏重紫微之柄出於藩則用蘇民氣入視草則允  
契宸衷贊大議於廟堂播清芬於簡策諫止東伐奮不  
顧身請復外臺凜然抗疏是以皇祖篤褒嘉之眷昭考  
垂飫賜之勤正有待於乞言何屢陳於謝事榮歸梓里

庶衍椿齡朕方嗣服於丕基天不憖遺於一老追惟往  
行惕用興懷俾超進於孤卿仍具頒於寵數於戲千古  
淵源之學蔑以踰修一生忠義之心諒無愧軾顧二賢  
已膺於美謚而兩字宜媿於前休精爽如存欽承不昧  
可贈榮祿大夫少保謚文忠公

左丞許衡贈官制

姚燧

天非繼聖學之墜緒則不生命世之大才國欲與王道  
以比隆肆用為烝民之多覺何物故之已久尚人思之

未忘故資善大夫中書左丞集賢大學士兼國子祭酒  
教領太史院事許衡玉裕而金相準平而繩直出處則  
惟義所在言動必以禮自持休休焉有容屬屬乎其敬  
人能弘道惟朝聞夕死之是期我欲至仁非晝誦夜思  
而不得行己似秋霜烈日化人如時雨和風來席下之  
摠衣滿戶外之列履達簡在帝心者率多丞弼窮困守  
師說者不失善良鶴鳴九臯而聲聞于高鳳翔千仞必  
德輝乃下爰立相以堯君舜民之志所告上皆伊訓說

命之言丹宸斥姦少不避雷霆之震擊青臺治厯本  
於策日月而送迎絲理窮而智益明隨任使而職斯舉  
今既亡矣誰其嗣之於戲在爾身有垂沒世之名於朕  
心有失同時之恨雖成廟納書以命謚固已振木鐸之  
高風而功臣胙土則未加用申錫彝章於下地光靈如  
在寵數其承可贈正學垂憲佐運功臣太傅開府儀同  
三司追封魏國公仍謚文正

元帥烏葉爾贈謚制

姚燧

惟太祖之基命龍遂乘雲有良臣以樹勲魚猶得水展  
我同姓豈伊異人故金紫光祿大夫北京等路兵馬都  
元帥烏業爾氣鍾光嶽之純全誠貫金石之堅確智足  
謀國勇則冠軍佐天運之維新憤人心之未定既降復  
叛必煩以行故自北而徂南首遼尾魏亦攘左而塞右  
膺齊背秦語其跋履於四方數豈戎衣之百襲為庸已  
懋其報宜豐可當非劉氏之不王姑啓若魯侯之大宇  
併申褒典少慰英靈噫佳城之鬱年三千名固已昭乎

白日分國於肇州十二澤期不斬於黃河可贈某官追封營國公諡忠勇

元帥耨埒贈謚制

姚燧

朕聞率土之臣莫如同姓干城之將尤可異恩故遠稽於禮經用厚加乎愍冊具官某其在弱冠嘗為選鋒迅與鷹揚號為萬人之敵虢如虎視隱然千里之威屬鉅寇之及郊乏總戎之制閫求可居此孰有異然其為人心所歸不待君命之至推使秉鉞辭拒循墻即下令

於轅門已折衝於尊俎握機旗建四川之草木知名開  
壁鼓行三峽之星河動影勇頗牧之非匹策孫吳之可  
方入阨危則膺衆所不先分賜與則如士之最下勁騎  
所蹙堅城每摧如斯宣力於兩朝何止出奇於百戰嗚  
呼降年弗永為烈則多雖狀不及識之亦心未嘗忘者  
置戶以守何樵牧可侵馬鬣之墟故壘即封或魂魄猶  
思蠶叢之國可贈某官追封蜀國公謚忠武

丞相阿勒坦台贈諡制

姚燧

臣為委質勞於同軌之間國以念功恩及綈衣之後雖  
飾終其時有所未及在追恤今日烏可或遺爰寵幽褒  
用昭異數故光祿大夫江西等處行中書省左丞相阿  
勒坦台力齊嶽負量與川涵託開國將種之苞根挺明堂  
工師之大木受任閭外賈勇籌邊為憲宗入蜀之前  
鋒因殘百粵非世祖投江以尺箠不返三苗報效之私  
寤寐不置百其身以奚恤一迺心之是期會師征險順  
而貞得夬剛決柔之兆考版圖之幅裂秉旄鉞以鼓行



將削尊號於偏方必使義聲以先路勢乘破竹名正色  
茅有不待陣風蛇之蟠而已飛塵星駟之捷如震如怒  
衽金革北方之強于理于疆盡江漢南國之紀羣黎壺  
漿而崩角幼主席藁以泥頭瘁事匪伊成功能爾凡十  
年為丞于行省奄一旦違世於先朝白雲杳歸于青山  
清風空遺于黃閣像未麟臺之貌服先龍袞之升既進  
師垣又建王國俾大書于神路過者式焉示絕等于臣  
鄰忠斯勸矣尚膺茂渥少慰營魂可贈推忠翊運宣力

功臣開府儀同三司太師上柱國追封順昌郡王謚武敏

妻札拉爾氏封王夫人制

姚燧

大帝立極之十五年嘗曰昔我太祖戡定中夏日不暇給由天未厭宋德故帝制偏方命將出師一家天下今惟其時曾不三年墟其廟社雖曰睿算萬舉萬全亦大臣奉辭宣力死職忘身有以致茲厥功茂哉用是追崇故光祿大夫江西等處行中書省左丞相阿勒坦台為推

忠翊運宣力功臣開府儀同三司太師上柱國順昌郡  
武敏王其故妻扎拉爾氏在父母家幽閒而禮其移天  
也淑慎有聞所可盡傷在不壽考以語婉德不及見夫  
丞相建希世之功以語娠賢不得食子大夫糾官邪之  
祿非賁玄壤曷慰貞魂可封順昌郡王夫人

丞相達哩岱追贈淇陽王制

姚燧

出入帷幄在人十能而已則千計謀廟堂為相一年而  
疾居半竟邦家之殄瘁宜王禮以追崇故開府儀同三

司中書右丞相監修國史太保太子太師知樞密院徽  
政使中政使宣徽使左都威衛指揮使達哩岱維昔開  
國之遺苗乃今太師之元嗣由爾世胄為我親臣事世  
祖至今也凡三朝職食官而久者非一日灼其廉明而  
忠亮與夫恭遜而溫文眷茲中書出庶政之原居以右  
相絕百僚之席使加中政機總六軍善調護而長宮師  
監纂修以成國史如此重職皆所裕為一德可以寬鄙  
夫片言奚止簡繁務思過榮之可懼視倖利以不貪同

綰銀艾者十人爾先辭免其太尉均受錫田以萬畝爾獨還致於司空觀父子之並相一門求聖賢與尚友千古改為改作緇衣何賴乎武桓拜後拜前赤舄未慚於周魯方歌功於清廟倏委魄於玄閭豈意少者沒而老者存益信神難明而理難測憐乃公獨傷於漠北誓爾後均胙乎淇陽嗚呼何但上下床在餘子可束之高閣如失左右手慨正人不作於下泉咨爾靈明歆朕休命可特贈封謚為懷忠昭德佐治功臣開府儀同三司太

師上柱國淇陽惠穆王

妻緯斯滿公主封王夫人制

姚燧

朕自踐阼于今三年洪惟天地祖宗之佑陰陽和平星緯咸若民物豐阜邊鄙不聳朕是用大賚于羣工凡嘗執政柄理者必追錫及于三世而伉儷之賢亦舉嘉褒於戲是曠代之典也具官達哩岱妻某毓秀朱邸作配相門少習儀訓閑于婦道貞順著稱垂範閭閻相厥夫子為世英宰而芳蘭早萎不終榮顯懿彼宗戚失此

女師開吉壤於淇陽正邦家之顯位服我新寵妥爾幽靈

耶律鈞贈官制

姚燧

臣克厥艱而始民敏其德子焉能仕皆由父教之忠眷予問義之人師實漢僕射之位長固求還笏難斷抗章是用追崇莫先庶以垂裕乃後昭文館大學士中奉大夫國子祭酒耶律有尚之考提領東平路工匠所長官鈞中書猶子丞相從兄宗承遼室之遺苗襁死金源而

全節尚論其世孰踰爾家而又誨嗣續善詩禮之敦於  
以見平生戛紈袴之習自夫共工之謝晏然同俗之安  
爭饋肆乎五漿振衣罔於千仞奉先惟孝雖耆耄於禴  
祠也親焉接下以恭其臧獲之久故者民耳非直入官  
而知止抑展在家而必聞惜棄世於九齡負為國之三  
老於戲神遊安往定徘徊乎故鄉袞寵即封用昭章於  
凝墓嘉誄以副殊渥罔遺可特贈昭文館大學士資德  
大夫追封漆水郡公謚莊慎



高麗國王封曾祖父母父母制

姚燧

昔我太祖皇帝之奮舉漠北也東旌西旆分甸南服昭  
德示威所向臣妾惟時三韓境壤相聯天戈一臨開府  
儀同三司太子太師上柱國駙馬都尉瀋陽王征東行  
尚書省右丞相高麗國王王璋之曾祖故高麗王王暉  
深察機運舉國內嚮事會之來間不容髮自非秉志端  
慤明識遠慮疇克如是哉又屬遼民餘孽潛竊島嶼  
狂肆弄兵陸梁假息重煩命將致討于時冰雪沍寒饋

餉不通而暵乃能供侍轉輸師皆宿飽軍興器仗資助  
無闕復濟師徒往殄殘寇其於肇造開基立勲王室保  
民興邦莫之與比故得守土享年殆將四紀澤及後昆  
流慶斯永傳子若孫與國連戚不其躋歟是宜追崇上  
爵仍易嘉名魂而有知歆茲異數可贈敦信明義保節  
貞亮濟美翊順功臣太師開府儀同三司尚書右丞相  
上柱國高麗國王謚忠憲

崇德報功法舉追榮之典分邦列爵恩頒及內之章酬

我舊勲同茲顯號具官高麗國王王璋曾祖母柳氏傳  
芳令族作配高門屬皇祚之興隆偕名藩而臣附明賢  
所化貞信無頗傳子至孫極富與貴三韓保國位同異  
姓之侯王五等疏封名亞寡君之宗室聿新殊渥庸慰  
淑靈可追封高麗王妃

朕觀今天下有民社而王者惟是三韓及祖宗而臣之  
殆將百載厥父菑而子復肯播曰我舅則吾謂之甥既  
勲以親宜貴與富禮克先於事大典可後於追崇具官

高麗國王王璋之考純誠守正推忠宣力定遠保節功臣太尉開府儀同三司征東行中書省右丞相上柱國駙馬高麗國王王珣移孝為忠易威以惠禮樂刑政之修者典章文物皆燦然惟大猷之是經與小心之以翼初由世子己帝女之降釐旋俾嗣王非公孫之復始遂罷時貢其方物顧同歲賜於宗親責秉鈞以東征期奠枕於南面追叛王挺身於遼水出選兵壓卵以泰山戰踵未旋逆首已授雖居位未周於三紀而享年實過乎

七旬中壽共言今代希有矧其子式穀之是似則斯人  
沒世為不忘自官階而進之至師垣而極矣夫既封玄  
菟之墓表滄渤以為襟何必刑白馬以盟誓黃河之如  
帶尚期貞魄庸服恤章可贈純誠守正推忠宣力定遠  
保節寅亮弘化奉慶功臣太師開府儀同三司尚書右  
丞相上柱國駙馬高麗國王謚忠烈

三韓為國五季已王雖居東溟之濱寶享南面之樂  
由其先有功於太祖許帝室以連姻故季女鍾愛於世皇

即公宮而命醮方穠青軒之桃李俄淒白露於蒹葭眷  
懷懿親用隆恤典具官高麗國王王璋之妣皇姑安平  
公主高麗王妃發祥坤掖分派天潢以舜妃癸比之霄  
明為古公亶父之姜女善於嬪德車服不矜其夫家樂  
有娠賢茅土已纘其父服可謂全妻道之終始苟不因  
湯沐之安平非進大封曷彰尊屬於戲自他邦之道  
里距北闕以五千移近甸之河山盡東秦而十二明靈  
可作殊報是膺可追封皇姑齊國大長公主高麗王妃

元文類卷十一